


TEZAUUR LITURGIC
14 FEBRUARIE

ACATISTUL
SF. CUVIOS
ISAACHIE
DE LA
PECERSKA



MOSCOVA, 2000



АКАФИСТ ПРЕПОДОБНОМУ ИСААКИЮ ТОРОПЕЦКОМУ

Кондак 1

Избранный чудотворче и великий угодниче Христов, / восхваляем тя любовью чтуще честное житие твое, отче наш Исаакие. / Ты же, яко имеяй дерзновение ко Господу, / от всяких нас бед свободи, да зовем ти:

Радуйся, Исаакие, скорый помощниче и преславный чудотворче.

Икос 1

Ангелов Творец и Господь сил избра тя изначала, преподобне отче наш Исаакие, да, честным житием твоим прославив Пресвятую Троицу, приобрящещи великую силу над духами злобы.

Темже, восхваляюще тя, глаголем:

Радуйся, от рождения твоего Богом возлюбленный;

радуйся, на великия подвиги избранный.

Радуйся, яко мира всю красоту и лжу оставил еси;

радуйся, яко преселитися в горний Иерусалим
возжелал еси.

Радуйся, во обитель Печерскую к преподобному
Антонию притекий;

радуйся, от него на подвиги иноческия
благословенный.

Радуйся, смирения образ в себе явивый;

радуйся, смиренномудрием врага победивый.

Радуйся, Божественнаго призвания
сподобивыйся;

радуйся, благодатию Господнею оправдивыйся.

Радуйся, Царствия Небеснаго стяжателю;

радуйся, за нас пред Господем предстателю.

Радуйся, Исаакие, скорый помощниче и
преславный чудотворче.

Кондак 2

Видя суету мира сего и славу его, якоже дым
исчезающую, от юности возжелал еси Единому
Господу работати, преподобне. Темже и славу
неувядаемую стяжав, у престола Господа славы
предстоя, поеши Ему: Аллилуия.

Икос 2

Разум являя в житии твоём, преподобне отче,
уразумел еси, яко тленная мира сего скоро
преходят, все богатство твое нищим раздал еси.
В Киев, во обитель Печерскую к преподобному
Антонию потекл еси, возжелав инок быти.

Темже, восхваляющее тя, глаголем:

Радуйся, тленная мира сего ни во чтоже
вменивый;

радуйся, иноческое житие возлюбивый.

Радуйся, яко Христу Богу невозвратным
желанием последовал еси;

радуйся, подвигом добрым подвизавыйся.

Радуйся, воздержанием насладивыйся;

радуйся, в непрестанной молитве пребываяй.

Радуйся, растерзавый лжу, яко паучину;

радуйся, сохранивый славно истину.

Радуйся, премногими страданиями низложивый
диавольскую прелесть;

радуйся, яко попрад еси вся коварства вражия.

Радуйся, преподобных украшение;

радуйся, молитвенниче о нашем спасении.

Радуйся, Исаакие, скорый помощниче и
преславный чудотворче.

Кондак 3

Силою Божиею укрепляем, преподобне отче, вся послушания монастырская проходил еси и, от добродетели в добродетель восходя, подвиг затворничества восприял еси, выну в уединении Богу воспевая: Аллилуия.

Икос 3

Имеяй во уме и сердце твоём Единого Бога, преподобне отче, пребыл еси в затворе седмь лет. Аще и диавол, помыслив искусити Тя, во образе ангельством явился ти, песньми и плясанием тебе досаждая, но ты аки злато во искушении просиял еси и, великий подвиг юродства на ся восприем, врагу поругался еси. Темже, таковой победе твоей над силою бесовскою дивящися, вопием ти сице:

Радуйся, ради Господа затвор восприемый;

радуйся, в нём непорочно поживый.

Радуйся, диавольския козни победивый;

радуйся, аки злато во искушении просиявый.

Радуйся, в жизнь новую по искушении возродивыйся;

радуйся, в подвиже юродства славен явивыйся.

Радуйся, в души твоей образ Божий добре напечатлевый;

радуйся, поругание доблестне претерпевый.
Радуйся, страсти душевредныя возненавидевый;
радуйся, благодатию Божией врага победивый.
Радуйся, яко тобою Вышний прославися;
радуйся, яко Вышний и ты славы причастника
сотвори.
Радуйся, Исаакие, скорый помощниче и
преславный чудотворче.

Кондак 4

Бурею лютых помыслов враг человеческого рода
искуси ты, преподобне, но, всецело воле Божией
предався, попрали еси прелестника твоего и
воспеваеши Господу немолчную песнь:
Аллилуия.

Икос 4

Слышав жития древних подвижников,
преподобне, како, от Господа укрепляеми, труды
ко трудам прилагаху, тем подражати
возревновал еси и великий подвиг юродства на
себя восприял еси, во дни себе странна миру
являя, нощию же непрестанно в молитве
пребывая. Сего ради вопием тебе:
Радуйся, Христа ради юродивых житию
подражавый;

радуйся, любовь Божественную в сердце
стяжавый.

Радуйся, от мира поруган быти восхотевый;

радуйся, поношение Христово сладце
претерпевый.

Радуйся, яко на земли умалил еси себе;

радуйся, яко больший во Царствии Небесном
нареклся еси.

Радуся восшедый на высоту духовную;

радуйся, низложивый помыслы греховныя.

Радуйся, якоже светильник во тьме просиявый;

радуйся, якоже финикс в пустыне процветый.

Радуйся, братию твою возлюбивый;

радуйся, житием твоим путь спасения тем
явивый.

Радуйся, Исаакие, скорый помощниче и
преславный чудотворче.

Кондак 5

Богопесненную псалтирь во славу Божию в
уединении своем воспевая и к совершенству
неустанно простираяся, преподобне отче,
предстоиши ныне Богу с лики Ангелов, вопия:
Аллилуия.

Икос 5

Видев тя велика подвижника благочестия и проразумевая в тебе силу Христову ко отгнанию бесов, преподобный Антоний чудяшеся таковому о тебе изволению Божию. Мы же грешнии, имуще тя молитвенника непрестаннаго о душах наших, во умилении глаголем:

Радуйся, кадило благовонное усердных к Богу молений;

радуйся, гусли прекрасныя непрестающих святых песнопений.

Радуйся, яко молитвами твоими от бед избавляемся;

радуйся, яко предстательством твоим от сетей вражиих защищаемся.

Радуйся, ходатайством твоим жизни райския сподобляемся;

радуйся, недугов душевных и телесных прогонителю.

Радуйся, в многострастной плоти подвизавыйся яко бесплотный;

радуйся, во всех добродетелех многоплодный.

Радуйся, всем прибегающим к тебе с верою избавление от наветов вражиих;

радуйся, христианом крепкое прибежище.
Радуйся, верным твердое заступление;

радуйся, яко радость твоя вечна есть во
светлости святых.

Радуйся, Исаакие, скорый помощниче и
преславный чудотворче.

Кондак 6

Проповедуем многотрудное и добродетельное
житие твое, преподобне, веру и любовь ко
Господу, к Немуже измлада прилепился еси,
оправдания и законы Его исполняя. Сего ради и
даром чудотворений и прозрения прослави тя от
всея твари поемый: Аллилуия.

Икос 6

Воссиял еси, яко светильник, от града Торопца и
даже до Киева дошел еси, всю землю честным
житием твоим удивляя. Темже и мы, сродством
тебе почтеннии, взываем сице:

Радуйся, града Торопца преславное прозябение;

радуйся, именитых родителей возлюбленное
рождение.

Радуйся, все богатство твое нищим отдавый;

радуйся, нищетою богатство стяжавый.
Радуйся, иноческое житие твое бдением
украшивый;

радуйся, плоти твоей упокоения не давай.
Радуйся, непрерывным бдением крепкую силу
на бесы стяжавый;

радуйся, мечтания их и страх отгнавай.
Радуйся, образе истинного смирения;

радуйся, зеркало совершенного спасения.
Радуйся, потоком слез спасительных
орошенный;

радуйся, в ризу спасения оболченный.
Радуйся, Исаакие, скорый помощниче и
преславный чудотворче.

Кондак 7

Хотя подражати Агнцу Божию, вземлющему
грехи мира, преподобне, кротость и смирение
являл еси, скорби и обиды терпел еси. Темже и
на высоту добродетелей восшел еси и во
умерщвленном телеси, яко в тимпане, Богу
воспевал еси песнь: Аллилуия.

Икос 7

Новую благодать показа тебе Зиждитель,
преподобне, аще бо и умерл еси на земли
плотию, но душею жив еси и многая преславная
чудеса источаеши живущим на земли и
вопиющим тебе таковая:

Радуйся, яко житие истинное по Бозе явил еси;

радуйся, яко Того ищущим путь показал еси.

Радуйся, бдением противу врага ополчивыйся;

радуйся, пощением благодати Божия
насладивыйся.

Радуйся, игу Христову себе поработивый;

радуйся, покой от Него души твоей восприявый.

Радуйся, ланиты твоя от заушений не
уклонивый;

радуйся, плечи твоя кротко на раны отдавый.

Радуйся, от всякия скверны себе хранивый;

радуйся всего себе Богу в жертву предавый.

Радуйся, обители Печерския утверждение;

радуйся, граду Торопцу просвещение.

Радуйся, Исаакие, скорый помощниче и
преславный чудотворче.

Кондак 8

Странна и пришельца помышляя еси себе быти в мире сем привременнем, преподобне отче, и грядущих благ взыскуя, распинал еси плоть свою со страстьми и похотьми, вопия песнь победную: Аллилуия.

Икос 8

Весь от Всесвятаго Духа облагодатствован, преподобне отче, престолу Божию предстоиши, неизреченная славы наслаждаешься, темже в нетлении на земли почиваеши и подаеши дары исцелений вопиющим ти таковая:

Радуйся, верный рабе Владыки Всеблагаго;

радуйся, храме преукрашенный Духа Всесвятаго.

Радуйся, небесных сожителю;

радуйся, земным предстателю.

Радуйся, нищим и убогим общник явивыйся;

радуйся, всем сущим в нуждах предстателю.

Радуйся, в болезнях и скорбех целителю;

радуйся, яко сияеши светлостию дел святых.

Радуйся, облагоухающий чувства души и телес наших;

радуйся, утверждение граду нашему.
Радуйся, утешения подателю нескончаемый
чтущим твою память;

радуйся, от враг видимых и невидимых крепкий
наш заступниче.

Радуйся, Исаакие, скорый помощниче и
преславный чудотворче.

Кондак 9

Всеми добродетельми украшен был еси,
преподобне отче, егда ноцию темный враг,
явлься во образе света, неведением омрачи тя,
песнями и плясанием досаждая, биением,
ранами и заушением устрашая, остави тя едва
жива суца. Но ты, преподобне, тверд и
непоколебим пребыл еси. Молитвами святых
Печерских укрепляем, крепко попрал еси вся
коварства вражия и страшен врагу показался
еси, Единому прославляющему тя Богу взывая:
Аллилуия.

Икос 9

Витий множества не возмогут по достоянию
восхвалити твое по Бозе к нищим благоволение,
труды и подвиги твоя во славу Божию,
преподобне отче наш Исаакие. Воистину бо
житие твое превыше бысть всякия похвалы

человеческия, обаче мы, любовьию подвизаеми,
дерзаем пение тебе принести таковое:

Радуйся, в неослабнем посте себе соблюдый;

радуйся, нощи во бдении провождавый.

Радуйся, лжи диаволи обличителю;

радуйся, прелести бесовския посрамителю.

Радуйся, власть на духи нечистыя приявый;

радуйся, туюжде и по смерти удержавый.

Радуйся, собеседниче сил небесных;

радуйся, гражданине обителей вечных.

Радуйся, тела и страстей его умертвителю;

радуйся, чистоты и воздержания рачителю.

Радуйся, постом себе напитаый;

радуйся, слезами себе напоивый.

Радуйся, Исаакие, скорый помощниче и
преславный чудотворче.

Кондак 10

Спасти хотя душу твою от смерти греховныя,
все богатство твое нищим раздал еси. Пришед
же во обитель Печерскую, ангельский образ
приял еси и, отдався воли Божией, покорил еси
себе старцу, яко Самому Богу, Емуже ныне во
славе невечерней поеши: Аллилуия.

Икос 10

Стена крепкая и ограждение явился еси чтущим
твоя нетленные и многоцелебныя мощи,
блаженне. Воистину бо яко оплот показа тя
Господь нам защитника в бедах и напастех.
Темже не престай и ныне молитися Ему о
вопиющих ти таковая:

Радуйся, во обете девства чистоту сердца
явивый;

радуйся, послушанием служение Единому Богу
утвердивый.

Радуйся, нестяжанием высоту духа показавый;

радуйся, себе всецело Господеви предавый.

Радуйся, сирых и вдовиц заступление;

радуйся, младенцев и отроков наставление.

Радуйся, Господеви житием твоим угодивый;

радуйся, добрый рабе, в радость Господа твоего
вступивый.

Радуйся, заветов Христовых блюстителю;

радуйся, законов церковных хранителю.

Радуйся, угодниче Божий, благодатию
украшенный;

радуйся, светильниче веры, Святым Духом
возжженный.

Радуйся, Исаакие, скорый помощниче и преславный чудотворче.

Кондак 11

Пение усердное, в похвалу тебе приносимое от смиренных сердец наших, прияти, святе, не отвратися и узы лютых прегрешений наших разрешити Господа умоли, к Тому бо дадеся тебе дерзновение всегда пети: Аллилуия.

Икос 11

Свету Незаходимому дух твой уготовав и день твоего к Богу отшествия проразумев, паки в пещеру вселился еси, прехвальне, пост и молитву твою усугубив, да сугубыя венцы приобрящеши. Темже моли о нас, вопиющих ти таковая:

Радуйся день кончины твоея проразумевый;

радуйся, ко исходищу себе предуготовивый.

Радуйся, житие твое в сугубем посте и молитве скончавый;

радуйся, дух твой всесовершенно Богу предавый.

Радуйся, диавола постом победивый;

радуйся, венец правды от Христа получивый.

Радуйся, яко Господа бодрено сретил еси;

радуйся, яко светлость святых обрел еси.
Радуйся, к лику праведных сопричтенный;

радуйся, с сонмом мучеников сопрославленный.
Радуйся, преподобных собеседниче;

радуйся, о всех нас молитвенниче.
Радуйся, Исаакие, скорый помощниче и
преславный чудотворче.

Кондак 12

Благодати залог нам святыя твоя и
многоцелебныя мощи явишася, преподобне,
имиже Господь подают недугов исцеление и от
печалей освобождение всем почитающим тоя и
Тому вопиющим: Аллилуия.

Икос 12

Поюще и восхваляюще твое по Бозе преславное
житие, преподобне, зрим и исповедуем, яко
кончина твоя рождение бысть в жизнь
нескончаемую, еяже струи благодатныя
воскрыляеши и нам, благодарственно
ублажающим тя сице:

Радуйся, граду Торопцу и всей стране нашей
защитниче;

радуйся, православия поборниче.
Радуйся, досточудно поживый;

радуйся, душу твою Господеви предавый.
Радуйся, нетленное тело твое в залог
воскресения нам оставивый;

радуйся, ныне бо: «Свят, Свят, Свят», Богу в
Троице воспеваеши.
Радуйся, со всеми бо святыми во веки
пребываеши;

радуйся, яко славу Божию непосредственно
зриши.

Радуйся, во славе Престолу Творца предстоиши;

радуйся, с Небесе к нам милостивно приницай.
Радуйся, прошения наша скоро исполняяй;

радуйся, радости нам, благодати же и славы
вечныя ходатаю.

Радуйся, Исаакие, скорый помощниче и
преславный чудотворче.

Кондак 13

О, преславный чудотворче, угодниче Христов,
преподобне отче наш Исаакие! Приими сие
хваление от нас, недостойных раб твоих, и
умоли Господа сил, да утвердит святую Церковь
Свою, от враг видимых и невидимых, от раскола
и ересей ограждая ю, и нас в ней целы и
непреткновенны да соблюдет, здравие и

спасение и от бед всех избавление нам даруя,
вопяющим Ему: Аллилуия.

Сей кондак глаголется трижды, затем икос 1-й:
«Ангелов Творец...» и кондак 1-й: «Избранный
чудотворче...»

